

Aruba ta analisa estado y desaroyo di Verslavingszorg

E curiculo pa bay den nos scolnan ta cla, ley di edad minimo pa consumo di alcohol lo conoce cambio

Minister Richard Visser a duna di conoce

DEN un sala completamente yen na Westin Resort, exper-tonan y stakeholders trahando riba tereno di Cuido di Adiccion na Aruba ta discutiendo e estado y desaroyo di verslaging-szorg. Diferente presentacion y lectura ta tumando lugar, unda cu e ultimo informacion ta wordo comparti, como tambe proyectonan cu ta cla pa cuminsa ta wordo splica y ta dunando contenido na diferente proceso.

Minister di Salubridad Publico y Deporte, dr. Richard Visser a comparti cu esaki ta un tema di importancia general, cual sigur ta refleha den e participacion. Cu 340 persona registra p'e conferencia, aunke esaki di berdad t'e maximo cu por acepta, ainda tin hende ta yama puntra si tin cupo obtenibel.

E conferencia ta conta cu participacion di expertonan Hulandes di e centro "De Hoop" y otronan cu ta cooperando cu e organizacion, como tambe cu participacion di personal di Capriles Kliniek di Corsou.

E conferencia ta cubri tur aspecto relaciona na adiccion y tratamiento di adiccion na Aruba. Minister Visser a bisa cu e.o. e Nationale Drugsraad a splica nan structura y den un presentacion haci pa sr. Jan van der Straten, el a splica e structura nobo completo den detaye, unda cu riba e peticion haci pa dr. Visser na cuminsamento di Gobierno nobo na 2009, awendia adiccion no ta wordo trata mas como un tema di husticia, pero como un malesa.

Estructura nobo ta un colaboracion estrecho entre Gobierno y instancianan no gubernamental (NGO), cual ta inclui diferente fundacion y hasta fundacionnan religioso, Minister Visser a bisa. Mas di 100 persona cu ta traha pa Gobierno a wordo poni pa traha p'e diferente NGO-nan y e coordinacion entre Gobierno

cu e fundacionnan ta bayendo fenomenal den e structura unico cu a wordo crea pa cu e cuida di adiccion na nos pais, Minister Visser a expresa.

Cu e restructuracion, e adicto ta wordo trata na un forma mihor coordina y a expande e "vangnet", consecuentemente mehorando tambe e cuida cu ta wordo ofresi n'e adiccionan, Minister Visser a añadi.

E mandatario a splica cu durante e prome dia di e conferencia tambe a papia tocante e aspecto di curatela, o sea "onder curatele stelling" y e parti hudicial civil, como tambe e parti hudicial penal y con esaki lo lora.

Tambe a presenta un update riba e centro CPT, e halfway housenan pa hende muher y pa hende homber, cursonan cu ta wordo duna actualmente, e estudio investigacion haci pa Universidad di Aruba cu ta presenta un "nul-meting" di e situacion di adiccion na Aruba y e rol importante di FADA den e trabao di prevencion.

Durante e presentacion di Adopt-An-Addict, un ex-adicto a conta su experiencia, di su bida y a duna un toke personal, humano n'e conferencia.

Gobierno a bin cu un structura nobo, unico, cu ta duna e poder n'e stakeholders, pero "Gobierno ta keda cu e "sturing", incluyendo e.o. e sistema di apoyo pa loke ta trata finansa, personal, e sistema di registracion digital EZRA, e helpline 190 y diferente otro aspecto," Minister Visser a elabora.

Den cuida di adiccion diferente otro departamento di Gobierno ta partcipe y e funcionamiento hunto cu polis, educacion y sociale zaken tambe a wordo treci dilanti.

LEY DI EDAD MINIMO PA CONSUMO DI ALCOHOL



Minister dr. Richard Visser a splica tambe cu ta prueba cu e prome paso den adiccion na substancianan ilegal hopi biaha ta cuminsa cu consumo di alcohol y esaki na un edad hoben. Esaki tambe tabata e caso di e ex-adicto cu a comparti su historia.

Pa yuda den e combatimento di uzo di substancianan ilegal, como un di e medidanan preventivo, actualmente ta trahando riba un cambio di ley pa

hisa e edad legal pa consumo di alcohol di 16 aña pa 18 aña, Minister Visser a anuncia. Asina lo trata di limita un di factornan di riesgo grandi, segun e mandatario.

CURICULO PA BAY DEN SCOLNAN

Un otro medida pa preveni cu nos mucha y hobennan lo wordo involvi den uzo di droga, t'e curiculo nobo pa nos scolnan. Pa hopi aña tabatin falta di

materialnan di conscientisacion y informacion nobo, Minister Visser a bisa, añadiendo cu mester a determina tambe p'e desaroyo di e materialnan aki na ki edad ta drenta scol cu splicacion tocante droga y con ta haci'e exactamente.

E proceso a tuma dos aña, pero awor tur e "boekwerk" ta cla y FADA a keda encarga pa maneha e proyecto den tur nos scolnan, Minister dr. Richard Visser a conclui bisando.